

Inzko čestitao Almi Zadić na imenovanju za austrijsku ministricu pravde



Visoki predstavnik Valentin Inzko danas je uputio čestitke Almi Zadić povodom njenog imenovanja na poziciju ministrice pravde u Vladi Republike Austrije te je izrazio želju za nastavkom i intenziviranjem odnosa između Bosne i Hercegovine i Austrije na polju pravosuđa.

„Nakon baronese Arminke Helić u britanskom Domu lordova i bivše švedske ministrice obrazovanja Aide Hadžialić, ovo je još jedna talentirana i uspješna mlada osoba podrijetlom iz Bosne i Hercegovine koja je svojim predanim radom i golemom energijom uspjela ostvariti izuzetnu karijeru u inozemstvu.

Kao izbjeglica, Alma Zadić je završila osnovnu školu, gimnaziju i studij prava s magisterijem i doktoratom u Beču. Svoje studije je usavršavala na Katoličkom univerzitetu Svetog Srca u Piacenzi i na čuvenom Univerzitetu Columbia u New Yorku. Radila je u brojnim međunarodnim institucijama, uključujući i Međunarodni krivični sud za bivšu Jugoslaviju te kao odvjetnica u renomiranom međunarodnom odvjetničkom uredu.

Od 2013. godine, Zadić je članica Global Shapers Community, međunarodne organizacije mladih ljudi koji preuzimaju odgovornost za sudbinu planeta.

Ovim putem njoj osobno upućujem najiskrenije čestitke i želje za uspješan mandat. Istodobno, ovo je i poruka političkim

elitama u Bosni i Hercegovini da se energičnije angažiraju na sređivanju stanja u BiH kako mladi ljudi ne bi morali odlaziti u inozemstvo te kako bi svoje potencijale mogli razvijati i realizirati kod kuće, u Bosni i Hercegovini, za dobrobit njenih građana," rekao je visoki predstavnik Inzko.

Inzko je također dodao da se možemo zapitati bi li Alma Zadić ikada bila imenovana na poziciju ministrice pravde na državnoj, entitetskoj ili kantonalnoj razini da je ostala u Bosni i Hercegovini.